

ՄՈՐՈՒՄ ՍՏԵՓԱՆԻ ՀԱՍՐԱՅԱՆ

Սովետական հայագիտությունը ծանր կորուստ կրեց: Երկարատև հիվանդությունից հետո, փետրվարի 25-ին, 77 տարեկան հասակում վախճանվեց ականավոր պատմաբան, բանասեր և հնագետ, գիտության վաստակավոր գործիչ:



Հայկական ՍՍՀ գիտությունների ակադեմիայի թղթակից անդամ Մորուս (Մարգար) Ստեփանի Հասրայանը:

Մ. Հասրայանը ծնվել է 1902 թ. սեպտեմբերի 10-ին Սիսիանի շրջանի Ախլաթյան գյուղում: Նախնական կրթությունը ստացել է գյուղի դպրոցում, միջնակարգը՝ Բաքվում: Այստեղ, պրոլետարական միջավայրում, նա զինվորագրվում է հեղափոխության գործին. 1918—1921 թթ. մասնակցում Բաքվի կոմունայի, Հյուսիսային Կովկասի և Զանգեզուրի քաղաքացիական կռիվներին:

1922—1924 թթ. Մ. Հասրայանը սովորում է Երեանի պետական համալսարանի պատմության ֆակուլտետում: 1925—1927 թթ. մոբիլիզացվում և կոմերիտական լեգավար աշխատանք է

կատարում Սիսիանում, Գորիսում, Դիլիջանում: 1930 թվականին էքստերն քննությամբ ավարտում է համալսարանը և ամբողջովին նվիրվում գիտական աշխատանքի: 1931—1932 թթ. ասպիրանտական ուսումնառությունն անց է կացնում Լենինգրադում. Ն. Մառի և Հ. Օրբելու ղեկավարությամբ:

Վերադառնալով Երեան, Մ. Հասրայանը 1933 թ. աշխատում է նյութական կուլտուրայի պատմության ինստիտուտում, որպես ղերեկտորի տեղակալ, 1934—1936 թթ. կուսակցության պատմության ինստիտուտի ղերեկտորի տեղակալ և հեղափոխության թանգարանի ղերեկտոր, 1937—1938 թթ. Մատենադարանի ղերեկտոր: Այդ տարիներին Մ. Հասրայանը բեղմնավոր գիտական և կազմակերպական աշխատանք է կատարում հատկապես Հայաստանի հեղափոխական շարժումների պատմության ուսումնասիրության բնագավառում:

1940 թվականից Մ. Հասրայանի գիտահետազոտական աշխատանքներն ընթանում են հնագիտության, բանասիրության և հայ ժողովրդի հին ու միջին դարերի պատմության ուսումնասիրության գծով: 1940—1941 թթ. նա ղեկավարում է Ավանի նշանավոր հուշարձանի հնագիտական և ճարտարապետական ուսումնասիրությունը: 1942—1946 թթ. աշխատում է գրականության ինստիտուտում, գրադվում բանասիրական հարցերով, միաժամանակ (1943—1946 թթ.) վարում ԳԱ հասարակագիտական բաժանմունքի գիտական քարտուղարի պաշտոնը: 1947—1954 թթ. Մ. Հասրայանը պատմության ինստիտուտի ավագ գիտաշխատող էր պատմության, հնագիտության, դասագրքերի հետ կապված բարդ ու կոնկրետ հարցերի գիտական մշակման գործուն մասնակից:

Հայն էր ու բազմակողմանի Մորուս Հասրայանի գիտական հետաքրքրությունների շրջանակը, հեռասլաց նրա մտքի թռիչքը: Հայաստանի պալեոլիթի, հայ ժողովրդի ծագման, Մովսես Խորենացու Պատմության, հայ ազատագրական սյուրբարի, հասարակական-քաղաքական մտքի, հնագիտության, բանասիրության, ճարտարապետության և շատ ու շատ ուրիշ հարցեր, իր գրավոր և բանավոր ելույթներում, նա քննում ու վերլուծում էր խորությամբ ու կուռ տրամաբանությամբ: Նա իր մեծ ուսուցիչներին՝ Մ. Ա-

րեղյանի, Հ. Մանանդյանի, Հ. Աճառյանի, Ն. Մառի, Հ. Օրբելու և մյուսների արժանավոր աշակերտն էր, երիտասարդ սերնդի հետ նրանց կապող ոսկե կամուրջ։

Անգնահատելի է Մորուս Հասարակականի վաստակը սայաթնովագիտության մեջ։ Սայաթ-Նոփայի հայերեն տաղերի խմբագրությունն ու Հշգրտումները, վրացերեն և ադրբեջաներեն տաղերի հայերեն լատինագրված թարգմանություններն ու մեկնաբանությունները, հիբրավի, բանաստեղծական տաղանդի, պատմագիտական ու բանասիրական խորաթափանց մտքի ու լայն գիտելիքների արգասիք էին։ Նա նոր աստիճանի բարձրացրեց սայաթնովագիտությունը։

Հայրենանվեր գիտնականն ու մանկավարժը մոտ 50 տարի դասախոսական աշխատանք էր կատարում Երևանի բանֆակում, կուլպրոցում, պետական համալսարանում և խ. Աբովյանի անվան մանկավարժական ինստիտուտում։ Այստեղ նա վարել է նաև հայ ժողովրդի պատմության ամբիոնը։ Մանկավարժի բնատուր ձիրք ունեւր նա, ուսանողությանը բազմակողմանիորեն կըրթելու և դաստիարակելու բարձր ունակություն, սեփական օրինակով երիտասարդության վրաներգործելու կարողություն ու հմայք։ Նրա հազարավոր սաներից շատերն այսօր նշանավոր գիտնականներ և մանկավարժներ են, կուսակցական ու պետական աշխի ընկնող գործիչներ։

Շուրջ մեկ տասնամյակ նա գլխավորել է Հայաստանի պատմության թանգարանը, ուր նվիրումով պահպանել, հարստացրել ու ժողովրդի սեփականություն է դարձրել մեր դարավոր մշակույթի գանձերը։ Ե. Լալայանի, Ե. Շահադիդի, Ս. Լիսիցյանի, Ռ. Գրամբյանի, Կ. Ղաֆադարյանի և ուրիշների անվան հետ, Մ. Հասարակյանի անունը, անտարակույս, իր արժանի տեղը կգրավի թանգարանագիտության պատմության մեջ։

Մ. Հասարակյանը մեկն էր այն քչերից, որ իր

հարուստ գիտելիքները ի սպաս դրեց նաև սփյուռքահայությանը։ Բեյրութի հայկական առաջադիմական կազմակերպությունների հրավերով, 1965—1966 թթ. նա դասախոսություններ կարդաց Հայկազյան կոլեջում և կրթական այլ հաստատություններում, իր կենդանի և հմայիչ խոսքով լիբանանահայությանը ծանոթացրեց մայր հայրենիքի աննախընթաց վերելքի, գիտության ու մշակույթի ծաղկման հետ, սատար եղավ հայագիտական բարձր կուրսերի կազմակերպմանն ու երիտասարդ հայագետների պատրաստմանը, հայրենիքի և սփյուռքի գիտական կապերի ամրապնդմանը։ Այդ և հետագա տարիների նրա ու ճարտարապետության դոկտոր, պրոֆեսոր Վարազդատ Հարությունյանի համատեղ աշխատանքի արդյունքը եղավ 1975 թ. Բեյրութում հայերեն, ֆրանսերեն և անգլերեն լեզուներով շքեղ հրատարակված «Հայաստանի հուշարձանները» արժեքավոր աշխատությունը։

Հայրենիքը բարձր է գնահատել Մ. Հասարակյանի գիտական-մանկավարժական վաստակը. նա քանիցս պարգևատրվել է ՀՍՍՀ Գերագույն սովետի պատվոգրերով, 1961 թ. արժանացել է գիտության վաստակավոր գործչի բարձր կոչման, 1963-ին ընտրվել ՀՍՍՀ ԳԱ թղթակից անդամ։

«Քայլող հանրագիտարան» — այդպիսին էր բազմակողմանի գիտելիքներ ամբարած, միշտ արթուն, պրպտող ու խորաթափանց մտքի տեր, համեստ ու ազնիվ, ամենքից սիրված ու հարգված մեր անզուգական Մորուսը։ Հիանալի մարդու և քաղաքացու, անշահախնդիր, ուղղամիտ ընկերոջ՝ Մորուս Հասարակյանի հմայիչ կերպարը միշտ վառ կմնա բոլոր նրանց սրտերում, ում համար թանկ է գիտության երախտավորների հիշատակը։

ՎԱՐԴԱՆ ՊԱՐՍՄՄՅԱՆ

Պատմական գիտությունների դոկտոր